

Rimnau savida per la pratica ed il success sper l'aua

30 personas ein separticipadas la sonda al cuors per pescadurs noviz a Trun

DA HANS HUONDER / ANR

■ **Tgi che vul reter la patenta da pesca sto esser scolaus. In cuors ed in examen ein la premissa. La scolaziun vegn puschida dall'Uniu cantunala dils pescadurs dil Grischun en tuttas regiuns dil cantun. Ina tala ei vegnida offerida la sonda vargada a Trun.** Tgi che mazza animals sto esser scolaus. Quei vala era pils pèschs, respectivamein pils pescadurs sin fundament dalla lescha per la protezzion dils animals. Aunc avon paucs onns saveva in e scadin prender la patenta da pesca el cantun Grischun senza esser en possess dalla pli minima experienscha da pesca. Quei ei semidau avon rodund diesch onns ed oz ein in cuors cun teoria e pratica sco era in examen final la premissa per obtener la patenta.

Cuors obligatori ed examen

Dapi igl emprem da schaner 2009 ston tuts pescadurs che vulan reter en Svizra ina patenta cun in cuoz da dapli che 30 dis esser en possess digl attest da pesca (Sana). Ils cuors persuerter sco era ils examens porscha l'Uniu cantunala dils pescadurs da patenta. Igl ei denton era pusseivel d'absolver quels tier instructers privats. Sco quei ch'il coordinatur dalla scolaziun dils pescadurs giuvens pils cantuns Grischun, S. Gagl ed Appenzell, *Ueli Möller* da Panaduz, di sto minga noviz absolver il minimum tschun uras teoria ed in'ura pratica. Ils cuors che vegnan

purschi dall'uniu cantunala ein schizun aunc pli liungs: Els cumpeglian in di da teoria ed in di da pratica. Tenor Möller vegnan ogt entochen dudisch cuors purschi ming'onn el cantun Grischun. Persuerter stattan 25 instructers sco era gidonters a disposiziun. Terminuschan ils absolvents igl examen cun success survegnan els igl attest da pesca (Sana).

Teoria e pratica

Il fundament documentar dalla scolaziun vegn mess a disposiziun dalla Reit da formaziun dils pescadurs svizra. Aschia eis ei garantu che tuts pescadurs svizzers hagian la medema scolaziun e sappien aschia era ir alla pesca en in auter cantun. Il cuors sco quei ch'el ha giu liug la fin d'jamna vargada a Trun cumpeglia igl entir spectrum dils criteris dalla protezzion dils animals, l'impurtonza dallas auas entochen alla pratica d'ir alla pesca ed igl equipament necessari persuerter. Ella part teoretica digl emprem di dil cuors, la sonda, ein ils noviz vegni orientai dils instructers denter auter era davart la lescha, las specias dils animals che vivan ell'aua ni era la lavur che vegn prestada dallas uniuns e dil cantun concernent la tratga da pèschs. Sin differents posts ein els vegni instrui in detagl dalla pratica sco per exempel far nuvs, ligiar mustgas ed artechels da pesca, dalla lonscha entochen il crutsch. Cun in examen final cun 50 damondas ei quella part vegnida terminada. «Fetg paucs crodan en quei examen. Sche

quei ei il cass han els la pussevliadad da reter el en in auter liug», di Möller. Dil reminent: Ils davos onns ein quels cuors vegni visitai egl entir cantun Grischun da mingamai 300 entochen 400 personas. All'entschatta dall'introducziun dils cuors eran ei aunc rodund 1000.

Pescar en flums e lags

Il secund di dil cuors, la dumengia, ei vegnius nezegiaus dils instructers e gidonters per scolar ils noviz ella tecnica efectiva da pescar en flums e lags. Aschia han els fatg enconuschientscha cun l'estga ch'ei pusseivla ed astga vegnir duvrada per pescar, co igl indrez da pescar vegn montaus, con plum duvrar e daco ch'ins nezegia lonschas liungas ni cuortas. Cun quei cuors extendiu vul l'Uniu cantunala dils pescadurs dil Grischun porscher in'informaziun detagliada e cumpetenta. «Nus lein veramein mussar tut dad a entochen z. Tgi che frequenta il cuors sa serender suenter alla pesca. Naturalmein che l'experienscha da pescar ei lu caussa dil temps, respectivamein dalla diligenza dalla pescadura e dil pescadur», puntuescha Möller. Enteifer las regiuns vegnan ils cuors accompignai dallas uniuns da pescadurs. Cheutras han quellas era la pussevliadad da vegnir en contact cun noviz ed aschia animar in ni l'auter d'entrar ell'uniu. Dil reminent: Als cuors separticipeschan adina puspei era carschi, pia buca mo giuvenils ella vegliadetgna dils davos onns dalla scola obligatoria.



Al cuors ein ils utensils da pesca vegni mussai e demonstrei.



In bien equipament ei secapescha impurtons per ir cun success alla pesca.



Pescar cun mustgas pretenda bia savida, mo lu era experienscha.



Ueli Möller ei coordinatur dalla scolaziun dils pescadurs giuvens pils cantuns Grischun, S. Gagl ed Appenzell.

FOTOS H. HUONDER

reclama

Topaktuell
aus Ihrer
Region!

Südostschweiz
Informiert

Das Nachrichtenmagazin von Montag bis Freitag ab 18 Uhr auf TV Südostschweiz.

Respect! per giuvens e Wen-Do per giuvnas

Ina puschida dalla Pro Juventute Cadi

■ **(cp) La Pro Juventute Cadi ha puschiu la fin d'jamna dils 22 e 23 da mars 2019 in cuors cul tetel «respect!». 12 buobs ella vegliadetgna da diesch entochen tredisch onns ein separticipai a quei cuors.** En quel ei vegniu tematisau il semetter atras senza vegnir aggressiv, dir il meini senza offender enzatti e seriscuder sch'ei vegn inagada prigulus. *Samuel Gilgen*, pedagog social dall'organisaziun jugend.gr, ha menau atras quei cuors a Trun. Il venderdis ha ina sera d'informaziun per ils geniturs giu liug ed ils buobs ein vegni instrui en dus mezs dis co seriscuder tier situaziuns malempereivlas. Els han empriu d'enconuscher ils cunfins, sedefender fair e sepassar si detschiert. Cun differents giugs ed exerchezis ei il menader dil cuors vegnius da perschader ils buobs da sepassar si segir, sorprender responsabladad per quei ch'els fan, impunder la forza e tuttina sedefender fair ed era reflectar sur da quei che vegn fatg. Quei cuors per buobs ei vegnius organisau per

l'emprema ga ella Cadi. La Pro Juventute Cadi vul porscher quei cuors da niev mintga dus onns. Per buobas ella mede-

ma vegliadetgna ha la Pro Juventute Cadi gia puschiu differents gadas il cuors Wen-Do.

Il proxim cuors ha liug naven dils 7 entochen ils 9 d'october 2019 a Mustér. Informaziuns: www.projuventutecadi.ch



Impressiun dil cuors da respect!

MAD